


EPISTOLA' 310
MARTINI
BECANI SO-
CIETATIS IESV
THEOLOGI

A D
D. DAVIDEM
PAREVM THEO-
LOGVM HEIDEL-
BERGENSEM,

DE ACTIS COLLO-
QVIORVM SVVALBACENSIVM,
& de fide hæreticis seruanda,



MOGVNTIÆ,
Typis IOANNIS ALBINI.

M. DC. XIX.

EPISTOLA
MARTINI
BECANI SO
CULTATIS

A D
D. DAVIDEM
BARFAM THEO
LOGUM
DE ECCLESIA
SACRA



LIBRARY
OF THE
UNIVERSITY OF
CAMBRIDGE

311

I
PRIOR PARS
EPISTOLÆ
DE
ACTIS COLLOQUIO-
RVM SCHVVALBACEN-
SIVM.

SAlut Domine Paree. Cau-
sa, curte interpellem, est
hæc. Redeunti mihi supe-
rioribus diebus ex Au-
stria, vbi aliquot annos in Acadēmia
Cæsarea Viennensi commoratus sum,
obtulit Theologus Moguntinus libel-
lum, à te hoc anno 1619. diuulgatum,
cum hac inscriptione: *Acta colloquio-
rum Svvalbacensium, inter tres Doctores
Iesuitas, & Davidem Pareum Theologum
Heidelbergensem, mense Maio, anno 1608.
habitorum.* Miratus sum: & antequam
perlegerem, subito occurrit hæc cogi-
tatio: Quid hoc est? Iam decēnium ab-
ijt, & vltra, cum ista colloquia Svval-
bacensia inter D. Pareum, & nos habi-

ta sunt: Et nunc demum à D. Pareo e-
uulgantur? Cur non citius id factum?
Cur non viventibus illis, qui interfue-
runt? Cur post mortem illorum dilata
hæc Editio & promulgatio? Sine du-
bio, mala fide à Pareo actum. Sic ego.
Mox libellum inspicio & percurro. Et
ecce, hoc ipsum, quod tacitus apud me
cogitabam, in ipsa libelli præfatione
reperio, his ipsis verbis à te signa-
tum: *Neque, inquis, ab instituto me deter-
ruerant murmura multorum, editioni huic
parata: Cur non maturius ediderim? cur
nunc demum, aduersariis plerisque, vita fun-
ctis actionem intendam? Cur mihi potius,
quam illis credi velim? Ad quæ tria sic re-
spōdes: Primū equitati & patientiæ meæ.
Alterum necessitati ascribendū esse, pru-
dentes intelligent. De fide narrationis, quin-
quisque sentiat, quod volet, non impedio. Cui
vero subit dubitare, is lecto historia præ-
mio acquiescet, haud dubie, si bonus est: si
malus, suo per me fruetur ingenio.*

2. Sictu, D. Pareo. At magni viri ex-
istimant, non tam facile ac ossitanter
murmura illa sopiri posse. Ego sane,
quod libere dicam, plus difficultatis in

ARGVMENTVM

EPISTOLÆ.

312



Eneuoletor: Huius Epistolæ pars duplex est: una de Actis Colloquiorum Suvalbacensium: Altera de fide hæreticis seruanda. Vt prioris scopum ac argumentum intelligas, sic accipe. Ante undecim annos, (id est, anno 1608. mense Augusto) Dominus David Pareus, Professor Heidelbergensis, apud acidulas Suvalbacenses, ubi tunc valetudinis curande causa versabatur, habuit varia colloquia cum Iesuitis, Becano, Serario, Molhusino, de diuersis Christianæ fidei controuersis. Et quidē primo die Augusti ante

prandium, cum Becano de Purgatorio disceptavit, presente Sacerdote Catholico. Post prandium, cum Becano & Serario de autore Peccati, presente Adriano Romano, Doctore Medico. Sequentibus diebus, cum Molhusino, de Inuocatione Sanctorum, & quibusdam alijs capitibus, presentibus eodem Adriano, & Ioanne Rudgero Rectore Herbipolensi. Acta istorum colloquiorum tunc quidem priuatim scripta sunt à Pareo, ut ipsemet fatetur; sed iam primum, post tot annos, non sine suspitione male fidei, ab eodem in lucem edita. De hac re expostulat cum illo Becanus. Reliqua ex decursu Epistolæ facile intelliges. Vale, & boni consule.

PRIOR

313
ijs aduerto, quam tu forte arbitraris,
aut saltē præ te fers. Ideoq; statui pau-
cis ea examinare, ac familiariter de to-
to negotio tecum ratiocinari. Confido
non ægre te id laturum. Nec est, quod
metuas à me conuitia, calumnias, ma-
ledicta. Lubens abstineo ab his omni-
bus: Neque ingenio meo, aut instituto
consentanea sunt. Tu quidem (quod
postea obijciam) vix alijs præfidijs in
tuo libello usus es: Sed mihi fixum sta-
tutumque est, non regerere maledicta
pro maledictis; Sed modeste ac synce-
re, vt Christianum Theologum decet,
tecum disceptare. Ac tria illa potissi-
mum, quæ tuis verbis proposui, breuif-
sime discutiam. Primo, cur toto decen-
nio silueris. Secundo, cur nūc demum,
aduersarijs plerisq; vita functis, silen-
tium abrumpas. Tertio, cur tibi potius,
quam nobis credi velis. Addam aliquid
de Purgatorio & Auctore peccati, de
quibus inter nos in colloquijs actum
est. Reliqua, quæ cum Molhusino dis-
putasti, nihil ad me spectant, Cum
illo transige.

1. *Cur D. Pareus toto decennio
siluerit de Actis Colloquiorum
Svvalbacensium?*

3. **A** Is, id æquitati & patientiæ tuæ
ascribendum esse. Si ita est, nō
inuideo tibi has virtutes, quibus orna-
tum te esse insinuās. At secus rem habe-
re, facile ex tuis verbis conuincam. In
quibus tria reperio, quæ non æquitatē
& patientiam, sed animi turbati incō-
stātiā & acerbitatem manifeste pro-
dunt. Audi, obsecrō. Primum est: Ante
decennium, id est, anno 1609. mense
Augusto, scripsisti Epistolam ad Nobi-
lem D. Othonem à Berlips, in qua di-
serte promittis, te Acta Colloquiorum
Svvalbacensium breui in lucem editu-
rum. (Epistola hæc habetur in libello
tuo, pag. 131.) Verba Epistolæ sunt hæc.
*Dissertationes illas nostras Svvalbachia-
nas & egregios Iesuitarum triumphos sty-
lo populari, veletiam Latino, optima fide
publicare constitui, ut omnibus pateat ho-
rum proteruia. Idque faciam, si Deus volet,
breui sub vindemia ferias.* Secundum est:
In

In præfatione libelli sic habes: *Ego sane perpetuum ad hos mihi indixeram silentiū, præsertim hac mea ætate, quæ melioribus studiis debetur.* Tertium est: In eadem præfatione, post pauca, sic subijcis: *Tā atroci scandalo, quod Iesuita Lectoribus calumnia sua posuit, adeo me affectum commotumq; testor, ut ilico de silentio abrumpendo cogitarem.*

4. Si hæc vera sunt, inconstantem te esse necesse est: Si falsa, mendacem. Inconstantia in his deprehenditur. Primo, quod ante decennium habueris propositum diuulgandi Acta Colloquiorum Svvalbacensium. Secundo, quod illud propositum mutaueris, & perpetuum silentium tibi indixeris. Tertio, quod indictum silentium non seruaueris, sed ex subita animi commotione abruperis. Nullum hic vestigium patientiæ: Sed quidquid est, inconstantiam & animi turbationem præ se fert. Et quod fieri solet, cum inconstantia mendacium coniunctum est. Quando enim, quod tu asseris, perpetuum silentium tibi indixisti? Nunquam. Certe non ante decennium. Tunc enim de

venerunt opinionem, vel D. Pareum causam bonam egisse male, vel Iesuitas causam malam contra Euangelium Christi egisse bene: Eos ego rogatos peramanter nunc velim, tantisper ut suum illi suspendant iudicium, donec quæ dicturus sum de historia veritate, cognoscant. Æquum est enim, ut duas, quas habet, aures inter nos diuidant: Cumq; prius hauserint ea, quæ pars una pro sua causa ornanda, purgandaq; scripsit & disseminauit varie; etiam posterius legant, & cognoscant ea, quæ pars altera pro asserenda tuendaque causa, non sua, sed Euangelij Iesu Christi, ut iam pridem scripta, nunc tandem diuulgaret, aduersariorum effecit extorsitq; improbitas. Sic intelligent, Iesuitarum duorum, D. Becani & D. Molhusini quiritationes, iactantias, victorias, triumphos de D. Pareo esse vanissimos.

8. Hæctū, Paree. Sed aduerte, obsecro, quam pugnantia sint, quæ pro tua pugnatione adducis. In priori paragra-pho, totam culpam conijcis in solum Becanum: in posteriori, æque in Molhusinum. Rursum, in prioriallegas tres causas abrupti silentij. Vnam, ut veritatem à mēdacijs vindicare, Alteram,

vt scandalū iuuentutis minueres. Tertiam, vt asserendo tuo honori non deesses. At in posteriori, nullam aliam causam agnoscis, nisi solius Euangelij Iesu Christi. Et omnino secludis tuam causam, tuum honorem, tuam apud discipulos æstimationem. Adeo quidem, vt etiam ausis affirmare, hoc interesse inter te & nos : quod nos nostram causam, non Euangelij : tu non tuam, sed solius Euangelij defendendam susceperis. Hæc non cohærent, D. Doctor.

9. Vt interim dissimulem falsitates, quæ vtrique paragrapho inspersæ sunt. Aliquas attingam. Primo, ais, te non causam vestram, sed solius Euangelij Iesu Christi contra nos asserere ac tueri. At mi homo, præcipua causa, quam contra me asseris ac tueris, est hæc: Calvinistas non docere, Deum esse authorem peccati. Hæc non est causa Euangelij Iesu Christi, sed vestra. Deinde, si causam Christi asseris ac tueris, cur tam tarde id facis? Cur post elapsam decennium? adeo negligens in Christi

2. *Cur Pareus nunc demum, ad- 311*
uersariis plerisque vita fun-
ctis, silentium ab-
rumpat?

5. **Q**uid alij de hac re sentiant, facile dictum est. Aiunt multa à te consignata esse in Actis Svvalbacensibus, quæ reuera acta non sunt: Ideoque ne fraus & impostura detegeretur, distulisse te Actorum editionem in hunc annū, quod scires Catholicos omnes, qui testes interfuerant, iam certo ex hac vita decessisse: Nec deinceps metuendum esse, ne quis falsitatis te argueret; præsertim cum tibi constaret, Becanum, qui solus superstes est, in Austria commorari, & tam longo locorū intervallo à te distare, vt non facile possit intelligere, quid tu Heidelbergę scriberes, aut comminiscereris. Nihil erant, opinor, qui ita sentiunt.

6. Sed tamen, quid tu obtendas, ex te audiamus. Age igitur Paree, quid te impulit, vt abrupto decennali silentio, aduersariis plerisque
 vita

causa es, vt tot annorum decursu nihil egeris, nihil conatus sis, sed perpetuum silentium tibi indixeris? Et ne nunc quidem, elapso decennio, fecisses quidquam, nisi de tuo honore asserendo ageretur: facile apparet, tuam tibi potius, quam Christi causam cordi accuræ esse.

10. Secundo ais, nuper à quodam Theologiæ studiofo, monstratum tibi esse in meo Tractatu de Deo & Attributis diuinis, *nouum hæctenusque te latens mendacium.* Quod illud mendacium? Pareum concessisse, *Deum Caluini esse Diabolum.* Hoc non reperies in isto meo Tractatu. Non enim scripsi te concessisse, Deum Caluini esse Diabolum: Sed, Deum Caluini esse authorem peccati. Deinde falsum est, illud mendacium (vt tu vocas) Deum Caluini, ex tua concessione, esse Diabolum, latuisse te vsq; adhunc annum. Nam ante annos nouem (nempe anno 1610.) illud ipsum, totidem verbis ab Erudito & graui viro per literas ad te perscriptum est, vt diserte affirmas pag. 134. & sequentibus.

11. Tertio ais, hos fortasse, qui Becani & Molhusini chartas legerunt, in eam venisse opinionem, vel D. Pareum causam bonam egisse male: vel Iesuitas causam malam egisse bene. Non ita est. In eam potius venerunt opinionem, Pareum malam causam egisse bene: suam, non bene. Si hoc enigma non capis, explicabo. Malam causam egisti bene, id est, co modo, quo causa mala solet agi bene, nempe per conuitia, falsitates, criminationes. De quibus paulo post. Tuam causam non bene: quia sperabas honori, & æstimationi nominis tui aliquid accessurum, si scriberes. Non est factum. Derogatum est aliquid: nihil accessit. Et minus tibi nunc creditur, quam ante

12. Quarto ais. Duorum Iesuitarum, D. Becani & D. Molhusini quiritationes, purgationes, iactantias, victorias, triumphos de D. Pareo vanissimos esse. At ubi vnquam in meis opusculis, quæ hætenus scripsi, inuenisti meas quiritationes, purgationes, iactantias, victorias, & triumphos de D. Pareo, ratio e Colloquiorum Syvalbacensium? Nusquam.

quam. Tua figmenta, tuæ chimeræ sunt, quas obtrudis. Nihil vnquam scripsi de istis colloquijs, nisi hæc verba: Dicam, quid nuper contigerit. Autumno superiore noster Nicolaus Serarius, & ego eramus apud acidulas Svvalbacenses. Ibi commodè incidimus in Dauidem Pareum Calvinistam, & Professore Heidelbergensem. Salutauius hominem perhumaniter, & ille vicissim nos. In progressu, amice ac modeste mihi obiecit, quod in quadam disputatione, quæ typis edita est, scripsissem: Deum Calvinistarum esse authorem peccati. Respondi, me solide id probasse ex verbis & sententiis Caluini. Tum ille: Estosane, inquit, sit ista Caluini sententia: At nō Calvinistarum. Hic subridens Serarius, ita subiecit: Domine Paree, Hac lis facile, ut video, inter vos componetur, Sola particula, statum, expungatur, & res erit salua. Placuit hoc Pareo, & Colloquium solutum est. Vix Moguntiam reuersi eramus: Et ecce Pareus ad me Epistolam dat, in qua inter alia monet nos nostri officij, hoc carmine:

Vos quoque promissi memores, delete litura

Ingenua ST ARVM, impegistis quod male nostris.

An non fatetur hoc carmine, Deum ex sententia Caluini esse authorem peccati, tametsi Calvinum in hac re sequi non velit?

13. Hæc ego totidem verbis. (Primo quidem in libello de differentia inter Calvinistas, Pelagianos, & Catholicos in Negotio prædestinationis, anno 1609. Deinde in Tractatu de Deo & Attributis diuinis, anno 1611.) Nec aliud quicquam. At nihil ibi mearum quiritationum est, nihil iactantiarum, nihil triumphorum de D. Pareo. Si quæ quiritatio est, tua est. Conquestus es, me scripsisse, Deum Calvinistarum esse autorem peccati. Nihil ego cōquestus. Solum scripsi, quod tibi honorificum est, D. Pareum perhumaniter nos resalutasse, & amice ac modeste mecum egisse. Quid hic mali? Non video. Si D. Molhusinus quiritatus est, si iactantias, victorias, & triumphos de te scripsit ac diuulgauit, cur cum illo, adhuc superstitite, non transegisti? Cur nunc tādē,

illo

illo pridem mortuo ac sepultō, mihi obijcis, quæ ad me non pertinent? Ille, sine dubio, facile pro se respondisset, ut non semel ab eo præstitum est: non minori ipsius laude, quam tua infamia ac dedecore. Scripsit in te, *Speculum miseriarũ Parei*. Illud relege, si lubet. Quãquam si tam languente stomacho es, ut ægre possis concoquere (quod supra confitebaris) potius abstinendum esse existimo. Ad alia progrediamur.

3. Cur Pareus sibi potius, quam nobis credi velit?

14. **A**D hanc quæstionem (à qua pendet fides tuæ narrationis de Colloquijs Svvalbacensibus) dupliciter respondes. Primo sic: *De fide narrationis quin quisque sentiat, quod volet, non impedio*. Itaque, per te, unicuique liberum est sentire, quod vult. Liberum igitur est sentire, narrationem tuam esse mendacem, cui fides haberi nec possit nec debeat. Ec sic sentiunt Catholici. Sic plerique Lutherani, qui

tenorunt. Sic non pauci ex tuis fratribus Calvinistis, qui iam pridem de mēdacijs te accusarunt. Nosti, qui illi sint. Scaliger est, & quos repetere superse-
deo, propter ægram stomachi tui con-
coctionem.

15. Secundo sic respondes: *Cui vero subdit dubitare, is lecto historia proæmio, acquiescet sine dubio. si bonus est: si malus, suo per me fruetur ingenio.* Risi, cum hoc legerem. Primo, quod Lectorem dubi-
tantem de veritate tuæ narrationis, re-
mittas ad tuum proæmium, in quo as-
seris te *fideliter & sine dolo* narrare, quæ
gesta sunt. Quasi vero non æque in
proæmio, ac in ipsa narratione menti-
ri posses. Secundo, quod addas: *Acquie-
scet sine dubio, si bonus est.* Quasi bonus
non sit, qui tibi fidem non habeat. In v-
troque videris hunc circulum com-
mittere. Est ne Pareo credendum in
narratione Actorum Syvalbacensium?
Omnino. Quare? Quia in proæmio
dicit, se omnia *fideliter & sine dolo* nar-
rare. Sed vnde constat hoc proæmium
verum esse? Ex ipsa narratione, quæ fi-
deliter

deliter & sine dolo facta est. Sed unde sciam fideliter factam esse? Ex proœmio, in quod assertitur. Sed quid si proœmium sit fallax? Non potest fieri, quia respondet narrationi, quæ vera est. Sed de veritate narrationis quis securum me faciet? Veritas proœmij. At ego non credo proœmio. Si non credis, abi in malam crucem. Crederes haud dubie, se bonus esses. Itane, mi Circulator?

16. Ego sine Circulo, cādide & sincere dico, quod res est: Non magis tibi, quam mihi. Imo, tibi nullo modo in narratione Actorum Svvalbacensium credendum esse, propter has rationes. Primo, quia eo ipso, quod nō ausus fuisti diuulgare narrationē, nisi post mortem eorum, qui interfuerunt, reddidisti te suspectum de fide narrationis. Ego è contrario, quidquid scripsi de hac re, ante decennium scripsi, cum adhuc superstites essent, qui testari poterant. Nec ullus mihi tunc contradixit. Ne tu quidem, aut Batauis tuus, quos constat legisse ea, quæ tunc scripsi.

17. Secundo (quod in idem fere recidit) Quando duo litigant de homicidio ante decēnium perpetrato, & alter alterum reum agit; ei potius credendū est, qui mox ab initio, cum perpetratū est homicidium, proposuit narrationē rei gestæ, paratus audire testes, qui præsentes fuerāt; quam alteri, qui ab initio rem totam dissimulabat, & nunc primū prodit, quando testes mortui sunt. At tu mecum litigas de disputatione ante decennium habita, & alter alteri fugam obijcit. Ac ego quidem mox, peractā disputatione, historiam rei gestæ in lucem dedi, paratus subire censuram eorum, qui erant consciij. Tu vero rem totam dissimulasti, & nunc tandem prodixisti, quādo testes mortui sunt. Mihi igitur potius, quam tibi credendum est.

18. Tertio, Qui profitetur se velle fideliter & sine dolo narrare historiam rei gestæ inter duas partes litigantes, debet nudam rei gestæ historiam proponere, & ex se, neutram partem conuictijs aut calumnijs grauare, ne alteri plus

plus æquo addictus, ac proinde partialis esse videatur, cui minime credendū sit. At tu in procæmio profiteris, te velle *fideliter & sine dolo* narrare historiam rei gestæ inter te & Iesuitas: Et tamen perpetuo insectaris Iesuitas asperrimis verborum conuitijs ac contumelijs: Et è contrario, te ipsum vbique laudas & victorem pronuncias. Igitur alteri parti plus æquo addictus es, vt minime credendum tibi sit. Minorē probo ex tuis verbis, quia Iesuitas passim appellas *improbos, proteruos, mendacissimos, calumniatores, versipelles, truculentos, subdolos, perfidos, criminatores, vertiginosos, virulentos*. Taceo cæteras spurcicias, quas verecundæ aures non admittunt. Quæ omnia satis pdunt, turbato & iracūdo animo te fuisse, cū hæc scriberes. At de te gloriose vbiq; sentis. *Iesuita*, inquis, *mei vnius causa Svvalbachium conuolarunt*. Item, *Si dixero, illos plerumq; dedisse se turpiter, nihil mentiar*. Itē, ego eos disputando *huc abegi, vt se conuictos faterētur*. Et quæ similia sunt hominis arrogantis de se ipso Encomia. Quis tibi, tam prauis

affectibus ac passionibus in vtramque partem laboranti, fidem habeat? Si volebas fideliter & sine dolo historiam scribere, debebas hanc vel similem scribendi formulam vsurpare: *Iesuita sic argumentati sunt: Pareus sic respondit: Quid opus erat conuirijs?*

19. Quarto (quod primarium est) Illi minime credendum est in aliqua narratione, qui in eadem narratione de multis mendacijs & contradictionibus aperte conuinci potest: At tu, in narratione Actorum Syvalbacensium, de multis mendacijs ac contradictionibus aperte conuinci potes: Non igitur in ea narratione credendum tibi est. Minor posset tripliciter probari. Primo, ex nuda mea asseueratione; vt si nuda asseram, falsa esse, quæ scripsisti: sicut tu nude asseris, vera esse, quæ narraſti in secunda collatione. Sed is probandi modus non est sufficiens. Tu quidē illo vsus es: sed ex desperatione, quia alium non habebas. Secundo, ex adductione legitimorum testium. Sed quia testes, qui interfuerunt plerisque collatio-

latio-

lationibus, mortui sunt; neque à te, neque à me adduci possunt. Interfuerunt Serarius, Adrianus Romanus, Ioannes Rudgerus, Nobilis D. Otto à Berlips, alij plures. Nemo superest. Tu quidem appellas nostram conscientiam in testem : sed ego vicissim tuam appello. Tertio, ex tua ipsius concessione; vt si probem ex tuis verbis & scriptis, te tibi ipsi non constare. Hic modus conuincendi aduersarium efficacissimus est; quem etiam Christus confirmauit in parabola Euangelica, cum dixit, Lucæ 19. 22. *Ex tuo ore te iudico, serue nequam.* Hunc modum contra te vsurpabo : & ex tuo ore aperte conuincam, te mendacem esse, cui minime credendum sit.

20. Primo, igitur adduco illas contradictiones, quæ ex tua ipsius confessione hætenus allatæ sunt. Prima est: Parcus perpetuum sibi indixit silentiũ de Actis Colloquiorum Svvalbacensium : Non indixit sibi perpetuum silentium, sed ante decennium promisit se ea diuulgaturum, ac aliquot annis post, eadem recognouit & reformauit,

eo fine, vt diuulgaret: & tandem diuulgauit. Secunda: Pareus non alio fine inductus est ad Acta Colloquiorum diuulganda, quam vt Euāgelij Iesu Christi causam affereret, ac tueretur: Pareus coactus est Acta Colloquiorum diuulgare, vt honorem suum cōtra Iesuitas defenderet. Tertia: Pareum hactenus latuit, à Becano sparsum esse, quod ipse concessisset, *Deum Caluini esse authorem peccati*: Non latuit hoc illum hactenus, sed ante aliquot annos à quodam Medico per literas intellexit. Et sic deinceps.

21. Secundo, in titulo libelli tui sic scribis: *Acta Colloquiorum Svvalbacensium, mense Maio, anno 1608. habitorum.* At non sunt habita mense Maio, sed Augusto, vt tu ipse postea fateris, pag. 11. & sequentibus. Et quanquam hic error non magni momenti sit; error tamen est: ex quo manifeste colligi possit, nec facile, nec tuto credendum tibi esse, qui in ipso limine à veritate aberraueris. Nosti adagium.

22. Tertio, In præfatione pag. 6. asseris,

feris, te in colloquio mecum habito, *non semel depulisse eam blasphemiam à mente & sententia Caluini*, quasi ipse doceret, Deum esse autorem peccati, & consequenter, Diabolum. At pag. 146. contrarium scribis. Nimirum, quod illam disputationem de mente & sententia Caluini in aliud tempus reieceris: & de hac ipsa re scripseris ad me Moguntiam hoc carmen:

Dæmon sitne Deus Caluini, dispicietur

Æquo dehinc calamo: modo possis candidus esse.

Vnde etiam constat, mera figmenta esse, quæ in secunda collatione ais à te allata esse pro Caluini defensione. Nam in ista collatione nihil à te disputatum de Caluini sententia; sed, vt dixi ex tua concessione, omnia in aliud tempus reiecta.

23. Quarto, pag. 10. promittis, te nihil aliud narraturum, quam quod reuera in Colloquijs Svvalbacensib. inter te & Iesuitas propositum & disputatum est. At pag. 15. multa adducis contra pur-

purgatorium, quæ tamē in Colloquiis
 proposita & disputata non sunt; vt tu
 ipse fateris ad marginem, his verbis:
Hæc non dicta tunc, sed adduntur declara-
tionis causa. Quod vtinam in singulis
 pagellis ad marginem posuisses. Nam
 in singulis fere, contextis longas ratio-
 cinationes, quas hoc decennio domi
 composuisti, & nunquam in colloquio
 adductæ sunt. Vnde etiam perspicuum
 est, quam vane & iactabunde scripseris
 pag. 16. in hunc modum: *Ad illa cum*
Iesuita non haberet, quod directe responde-
ret &c. Ad quæ illa, Parce? Nimirum ad
 illa, quæ immediate præcesserant, de
 quibus ad marginem: *hæc non dicta tunc,*
sed adduntur declarationis causa. Si tunc
 non dicta, cur triumphas de victoria,
 quasi Iesuita ad ea respondere non po-
 tuerit?

24. Ex his paucis, quæ ex primis
 pagellis libelli tui desumpta sunt, aper-
 te constat, tibi credi non posse. Reli-
 quas pagellas, quæ multo plures sunt,
 non attigi, quia ad me non spectant, sed
 ad Molhusinum: Is, si viueret, paulo
 se-

feuerius tecum ageret, quam ego fecerim.

25. Nunc pro fine huius quæstionis sic concludo: De Actis Colloquiorum Svvalbacensium, tribus modis cōstare potest. Primo, ex asseueratione vnius tantum partis litigantis. Secundo, ex asseueratione testium. Tertio, ex confessione illius, contra quem agitur. Si primo modo agendum est; sicut tu asseris, veram esse narrationem, quam adfers: ita ego assero, falsam esse. Cur tibi potius, quam mihi credi vis? Si secundo, ego ante multos annos scripsi de Actis Colloquiorum, cum adhuc viuerent testes: tu omnia distulisti post mortem testium. Tu igitur suspectus es: ego esse non possum. Si Tertio, ego ex tua confessione conuici, mendacem te esse: Tu ex mea confessione conuincere id non potes. Hæc hætenus.

4. De Purgatorio.

26. **I**N primo colloquio disputatum est de Purgatorio, vt nosti. Ego pro

pro illo astruendo adduxi locum 2. Machab. 12. 43. Vbi Iudas Machabæus iussit offerri sacrificium pro defunctis. Et factum eius ibidem approbatur his verbis : *Sancta ergo , & salubris est cogitatio pro defunctis exorare , ut à peccatis solvantur.* Vnde conclusi, quosdam defunctos, post hanc vitam in eo esse loco ac statu, vbi per nostras orationes & suffragia iuuari possint. Eos autem non esse in cœlo ; quia qui ibi sunt non indigent nostris suffragiis : Neque in Inferno, quia ibi nulla est redemptio : Ergo in aliquo alio loco distincto, quem nos purgatorium appellamus ; Quia animæ defunctorum ibi purgantur, si quid purgandum habent.

27. Tu quidem fateris, me hoc testimonio vsum esse : Sed addis, D. Brederodius, qui tunc aderat, tria obieciſſe. Primo, quod libri Machabæorum sint Apocryphi, Ex quibus nihil probari possit. Secundo, quod factum Iudæ Machabæi fuerit superstitiosum. Tertio, quod illi, pro quibus Iudas curauit

rauit offerri sacrificium, decesserint in peccato mortali, tanquã sacrilegi; quia rapuerant anathemata per legem prohibita. Purgatorium autem non sit pro illis, qui moriuntur in peccato mortali.

28. Ego quidem memini, primũ illud obiectum esse, nẽpe libros Machabæorũ esse Apocryphos: sed de reliquis duob. nihil memini. Suspicio, te ista in Musæo adiecisse, vt narrationẽ faceres pleniorẽ, & magis pro tua causa plausibilem. Quod tñ frustra est, vt facile ex singularum obiectiõnum discussione constabit. Igitur prima obiectio est, Libros Machabæorum esse Apocryphos. Respondeo, quod tunc respondi, non Apocryphos, sed sacros & canonicos esse. Mecum sentiunt Innocẽtius. 1. Epist. 3. ad Exuperium c. 7. August. lib. 2. de Doctrina Christiana c. 8. Cõcilium Carthag. (cui etiam interfuit Augustinus) Gelasius Papa in Concilio Romano, Conciliũ Florentinũ in summa Bartholomæi Caranzæ, Concilium Trid. Et hoc tempore omnes authores & scriptores Catholici, toto orbe dispersi.

At

At Hieronymus, inquis, & quidam alij Patres non ita sentiunt. Audi, Parec. Hæc duo distincta sunt. Primo, Libri Machabæorum non fuerunt in Canone Iudæorum. Secundo, Libri Machabæorum non sunt Sacri & Canonici. prius quidem asseritur à Hieronymo, & ab omnibus merito asserendum est. Nam quando Canon Iudæorum ab Esdra, vel à Synedrio, tempore Esdræ, fuit consignatus; nondum exstabant libri Machabæorum. Quid ergo mirum est, si in illum Canorem relati non fuerint? At posterius non reperies in Hieronymo. Nusquam absolute asserit, libros Machabæorum non esse Canonicos, sed Apocryphos: quanquam asserat nō fuisse Canonicos respectu Iudæorum: Vel, non fuisse relatos in Canorem Iudæorum. Sicut diserte loquitur Augustinus lib. 18. de Ciuitate Dei cap. 39. Cum ait: *Machabæorum libros, non Iudæi, sed Ecclesia pro Canonicis habet.*

29. Altera obiectio est, factum Iudæ Machabæi fuisse superstitiosum. Absit, D. Parec. Factū ipsius laudatur in scriptura

ptura, vt dixi: Et ante me dixit Augustinus in lib. de Cura pro mortuis cap. 1. *In Machabæorum, inquit, Libris legimus oblatum pro mortuis sacrificium. Et mox addit, quod velim te aduertere: Sed etsi nusquam in scripturis veteribus legeretur, non parua tamen est vniuersæ Ecclesiæ, quæ in hac consuetudine claret, authoritas: ubi in precibus Sacerdotis, quæ Domino ad eius altare funduntur, locum suum habet etiam commendatio mortuorum.* An etiam Augustinum dices fuisse superstitiosum? Et pro eo, quod ipse dixit, non esse paruam vniuersæ Ecclesiæ authoritatem, suppones illud ex tuo Spiritu, non paruam esse vniuersæ Ecclesiæ superstitionem? Si hoc facis, damnas Augustinum & vniuersam Ecclesiam, quod est temerarium: Si non facis, damnas tuum errorem particularem, quod est laudabile. Elige alterutrum.

30. Tertia est, Eos, pro quibus Iudas Machabæus curauit offerri sacrificium, fuisse sacrilegos, ac proinde in peccato mortali ex hac vita decessisse.

An ergo, si sacrilegi non fuissent, putares recte fecisse Machabæum, sacrificium pro illis offerendo? Si recte, non omnis oratio pro mortuis damnanda est: cur igitur omnem damnatis? Si non recte, quid necesse est excipere sacrilegos, cum omnes, tua opinione, excipiendi sint? Et unde constat tibi de illorum sacrilegio? Fuerint certe auari, raptores, inobedientes; quia contra Dei præceptum abstulerunt aurum & argentum idolorum. An ideo Sacrilegi? Fuerint et sacrilegi. At non omne peccatum sacrilegij mortale est. Sæpe ob paruitatem materiæ, vel alias causas, potest esse veniale. Sed fuerit etiam mortale. Potuit tamē, quoad culpam expiari per actum contritionis, ante mortem. Et, quid si in plerisque; vel saltem in aliquibus, expiatum sit? Vides, quam multa tibi probanda sint, ut vel minimum efficias.

31. Hactenus de testimonio scripturæ a me citato. Nunc audiamus, quid tu cum D. Brederodio contra purgatorium opposueris. Ais te hæc opposuisse. Primo, quod anima filioli Davidis recta in
cœlum

cœlum delata sit, non in purgatorium. 324
Secundo, quod similiter Lazarus, non in purgatorium, sed in sinū Abrahæ sit deportatus. Tertio, quod latroni dictum sit, *Hodie mecum eris in Paradiso*, id est, in cœlo. Quarto, quod in Apocalyp. cap. 14. 13. scriptum sit: *Beati mortui, qui in Domino moriuntur. Amodo iam dicit Spiritus, ut requiescant à laboribus suis.* Quinto, quod eodem pertineat illud Christi, Ioan. 5. 24. *Qui verbum meum audit, & credit ei, qui misit me, habet vitam æternam. & in iudicium non venit, sed transijt à morte in vitam.* Ad tria priora ais me aliquid respondisse, sed non solide: ad reliqua duo nihil habuisse, quod responderem.

32. Ad tria priora sic respondi generatim: Neminem mortalium, ante Christum, ascendisse in cœlum, sed Christum fuisse primum, qui illuc ingressus sit. Et pro hac responsione citavi (non illud, quod tu fingis me citasse: *Nemo ascendit in cœlum, nisi filius hominis*) sed illud Hebr. 6. 19. *Vsque ad interiora velaminis, ubi præcursor pro nobis in*

troiuit Iesus. ex quo dixi aperte colligi, Christum, cum ascenderet in interiora velaminis, id est, in cœlū, fuisse præcursores, respectu omnium nostrum, quos ipse redemerat, & quibus ianuam regni cœlestis aperuerat. Neminem igitur, nec filiorum Davidis, nec Lazarum, nec latronem, ante Christum introisse. Quod autem non citauerim locum à te, sed à me adductum, potes ex eo meminisse, quod Heidelbergam reuersus, cum haberes sub manu commentarios tuos in Epist. ad Hebræos, diligenter conatus sis locum illum explicare, ne tibi videretur fuisse contrarius.

33. Quod porro addis, ad reliqua duo testimonia, me non habuisse, quod responderem; mirum non est, quia illa tunc non sunt proposita, sed postea à te adiecta. Quod video in singulis fere paginis à te factum, vt supra inuenui. Et omnino verisimile est, toto hoc decennio te laborasse in augenda, polienda, & reformanda tua Narratione: Neque attendisse, quam vere, sed quam speciose in

se in lucem prodire posset. Nega, si au-
des, iam antea extorſi à te hanc confes-
sionem: *Hæc non dicta sunt, sed adduntur
declarationis causa.* Adde aliam, quam
habes pag. 17. *Cum hæc, inquis, in ipsis a-
cidulis, duodecimo Iulij, anno 1615. recogno-
ſcerem, nimirum addendo, mutando,
detrahendo, pro tuo arbitrio.*

34. Netamen videar, ne nunc qui-
dem respondere posse ad ea, quæ hoc
decennio, dum Acta Colloquiorum
recognoscereſ, addidiſti; Paratus sum
singula repetere, & ad singula ſeorſim
respondere: Etiam ad tria illa priora,
quæ nunc maiori pompa à te conscri-
pta sunt, quam ante decennium in Col-
loquium fuerant proposita. Primo igi-
tur sic obijcis, pag. 14. *David optabat
ire ad infantem defunctum, quando
dixit: Nunc autem, quia mortuus est, cur
ieiunem? Nūquid potero reuocare eum am-
plius? Ego vadam magis ad eum: ille vero
non reuertetur ad me. (2. Reg. 12. 23.)* At
non optabat ire ad purgatorium, sed ad
cælum: Ergo statuebat, infantem suum
non iuisse ad Purgatorium, sed ad cœ-
lum.

lum. Respondeo. Duplex hic vitium est. Primo, quia maior est falsa. Non enim optabat Dauid ire ad infantem, sed solum dicebat se moriturum, sicut & infans erat mortuus. hoc patet ex antithesi, quam faciebat, quæ est eiusmodi: Ego non potero efficere, ut infans mortuus redeat ad vitam mortalem, in qua ego sum : Sed potius è contrario futurum est, ut ego moriar, sicut & ille mortuus est. Secundo, etiam si darem (quod minime facio) infantem Davidis recta iuisse ad cælum; Inde non sequitur, quod tu inferis, Non dari Purgatorium. Non enim necesse est, omnes iustos, qui ex hac vita decedunt, ire ad purgatorium; sed eos tantum, qui aliquid purgandum aut expiandum habent. Infantes autem, qui ante vsum rationis ex hac vita decedunt sine peccato Originali, nihil habent purgandum aut expiandum; quia nullam culpam, aut reatum pœnæ propria voluntate contraxerunt.

35. Secundo obijcis: Lazarus statim post mortem deportatus est in sinum

Abra-

Abrahæ, in locum solatij, vt constat ex illis Abrahæ verbis: *Nunc autem hic solatio fruitur.* At purgatorium nō est locus solatij: ergo non est deportatus in purgatorium. Respondeo. Esto: non sit deportatus in purgatorium. Hinc non sequitur, q̃ inferendū est. Non dari purgatorium. Iā ante dixi, nō omnes iustos ire ad purgatoriū, sed qui indigent. At nō omnes indigent. Igitur ex eo, quod Lazarus non iuerit ad purgatoriū, quia non indigebat: non potes inferre: Neminem ire ad purgatorium: Vel, non dari purgatorium. Sicut ex eo, quod sani non eant ad Acidulas Svvalbacenses, quia non indigent; non recte inferes, Neminem ire ad acidulas Svvalbacenses: Vel, nullas esse acidulas Svvalbacenses. Hoc pueri intelligunt.

36. Tertio obijcis: Christus dixit latroni, *Hodie mecum eris in Paradiso.* At per Paradisum, nec infernus, nec Purgatorium potest intelligi: Ergo intelligitur cœlum. Respondeo. Hic etiam duplex vitium est. Vnum simile præcedenti. Non enim sequitur: Latro iuit

ad Paradisum, & non ad Purgatorium;
ergo nullum est Purgatorium. Alterū,
quod per Paradisum putes cœlum in-
telligi. Non ita est. Alioqui Christus,
qui dixit, *Hodie mecum eris in Paradiso*,
debuisset eodem die ascendere ad cœ-
lum. At non ascendit, sed, vt in symbo-
lo profiteamur, *Descendit ad inferos*. Et
postea surrexit à mortuis; & post mul-
tos dies ascendit in cœlum. Quid igitur,
inquires, per Paradisum intelligi-
tur? Respondeo. Status Beatorum; vel
vt Theologi vocant, visio beatifica. Est
igitur hic sensus: Hodie clare videbis
diuinam essentiam (in qua visione cō-
sistit vera beatitudo) sicut & ego video.
At nemo, inquires, videt diuinam essen-
tiam, seu, quod idem est, nemo est in sta-
tu beatitudinis, nisi sit in cœlo. Erras.
Christus in hac vita fuit in statu beato-
rum; & tamen non fuit in cœlo. Quod
etiam dico de Angelis custodibus, qui
nobiscum versantur. Semper enim vi-
dent faciem Patris, qui in cœlis est. E con-
trario, Lucifer ante peccatum fuit in
cœlo, & tamen non vidit clare diuinam
essen-

essentiam. Sunt igitur distincta hæc duo: Locus beatorum, & status beatorum. Seu, cœlum, & cœlestis gloria.

37. Quæres forte, si infans Daudidis; Lazarus, & Latro, non fuerunt in cœlo, ante Christi ascensionem, vbi ergo fuerint? Ego vicissim quæro, vbi fuerint animæ eorum, qui post mortem, iterum ad vitam resuscitati sunt? Quo pacto ab Helia resuscitatus est filius viduæ Sareptanæ (3. Reg. 17. 20.) Ab Heliseo, filius Sunamitidis (4. Reg. 4. 34.) Ab ossibus Helisei, quidam alius, cuius nomen non exprimitur (4. Reg. 13. 21.) A Christo, filia Iairi, principis synagogæ (Lucæ 8. 54.) Et filius viduæ in Naim. (Lucæ 7. 15.) Et Lazarus in Bethania (Ioan. 11. 43.) Ab Apostolo Petro, Tabitha (Act. 9. 4.) A Paulo, Eutychus adolescens (Act. 20. 10.) Denique, tempore passionis Christi, *monumenta aperta sunt, & multa corpora Sanctorum, qui dormierant, surrexerunt.* (Matth. 27. 52.) Vbi, inquam, animæ horum fuerunt, antequam ad vitam reuocarentur? Nō in Inferno; quia ibi nulla est redēptio.

Nec in cœlo; quia alioqui non fuisset beneficium, sed pœna, si ex cœlo & cœlesti gloria debuissent redire ad hanc vitam mortalem. Superest ergo, fuisse in aliquo alio loco, qui à cœlo & Inferno distinguebatur. Idem ergo dicam de Infante Daudis, Lazaro & Latrone.

38. Quarto objicis illud Apoc. 14. 13. *Beati mortui, qui in Domino moriuntur. A modo iam dicit Spiritus, ut requiescant à laboribus suis: Opera enim illorum sequuntur illos.* Respondeo. Hoc nihil facit contra Purgatorium. Nam ibi agitur de tempore extremi iudicii, in quo illi, qui adorauerunt bestiam, id est, Antichristum, damnabuntur ad perpetuos cruciatus: Qui autem illi restiterunt, & pro Christo mortui sunt, accipient præmium beatitudinis. Vnde sicut de prioribus dicitur; *Fumus tormentorum eorum ascendet in secula seculorum, nec habent requiem die ac nocte, qui adorauerunt bestiam & imaginem eius:* Ita de posterioribus subjicitur; *Beati mortui, qui*

in Domino moriuntur. *A modo iam di-* 331
cit Spiritus, ut requiescant à laboribus su-
is, quos pro Christo perpessi sunt. O-
pera enim illorum sequuntur illos, id est,
 propter bona opera, & certamina con-
 tra AntiChristum suscepta, accipient
 æternam retributionem. Igitur ex
 hoc loco solum colligitur, post diem
 Iudicij non fore Purgatorium: sed a-
 lios ituros ad cœlum, qui pro Christo
 laborarunt: Alios ad damnationem,
 qui Antichristum secuti sunt. Nemo
 hoc negat.

39. Quinto obijcis illud Christi,
 Ioan. 5. 24. *Qui verbum meum au-*
dit, & credit ei, qui misit me, ha-
bet vitam æternam, & in iudicium non
venit, sed transyt à morte in vitam.
 Non dicit, inquis, Transiit à mor-
 te in purgatorium, sed in vitam æ-
 ternam. Respondeo. Hic tria ex-
 plicanda sunt. Primo, quid intelliga-
 tur per mortem. 2. Quid per vitam.
 3. Quid per iudicium. Tu omnia i-
 sta male interpretaris. Per mortem,
 intelligis mortem corporalem, qua
 ex

ex hac vita decedimus. Per vitam, intelligis vitam æternam, quæ datur post mortem corporalem. Per iudicium, intelligis illud, quo quis iudicatur ad pœnam Purgatorij. In omnibus erras. Per mortē, intelligenda est sententiā mortis æternæ, cui omnes homines subiecti sunt propter peccatum primi parentis (Rom. 5. 12.) Per vitam æternam, intelligēda est vita gratiæ, quæ est quasi via seu dispositio ad vitam æternam. Sicut patet Ioan. 17. 3. *Hæc est vita æterna, ut cognoscant te solum Deum verum, & quem misisti Iesum Christum.* Vbi fides in Deum & Christum, vocatur vita æterna, quia est via & præparatio ad vitam æternam. Denique, per iudicium, intelligendum est iudicium legis.

40. Hæc omnia patent ex similibus Christi verbis: præsertim ex illis, Ioan. 3. 17. *Non misit Deus filium suum, ut iudicet mundum, sed ut saluetur mundus per ipsum. Qui credit in eum, non iudicatur: qui autem non credit, iam iudicatus est.* Quasi dicat: Ego non veni ad iudicandos homines, sed ad saluandos. Velenim credunt

dunt in me, vel non credunt. Si credūt, non iudico eos ad mortem, sed à sententia mortis, cui erant obnoxij, transfero ad vitam. Si non credunt, ne sic quidem eos iudico, quia iam ante per legem iudicati sunt, ob legis transgressionem.

41. Item ex illis, Ioan. 3. 36. *Qui credit in filium, habet vitam æternam, nempe in spe & promissione: Qui autem incredulus est filio, non videbit vitam, sed ira Dei manet super eum. Quæ est illa ira? Sententia mortis æternæ, quæ in principio mundi super omnes filios Adæ denunciata est. De qua Apostolus Eph. 2. 3. Erasmus natura filij iræ, sicut & ceteri.*

42. Itaque sensus illius loci, non est hic, quem tu fingis: Qui credit in Christum, statim post mortem corporalem transibit ad vitam æternam, sine vlllo purgatorio: Sed est iste, quem scriptura ostendit: Qui credit in Christum, cum antea non crederet, transiit de sententia mortis ad vitam gratiæ, cum spe & promissione vitæ æternæ: Nec amplius est filius iræ, sed adoptionis: Nec iudicatur

catur per legem, tanquam reus; sed per susceptionem fidei, liber est à iudicio legis. An ideo post hanc vitam nullum est purgatorium? Non sequitur.

43. Vbi obiter notandum est, duplex esse iudicium: alterum Legis, alterum Iudicis. Lex dicitur iudicare, quia qui peccat in legem, per ipsam legem iam morti addictus est, quoad reatum seu obligationem; Tametsi sententia Iudicis nondum sit lata. Iudex dicitur iudicare, quia profert sententiam mortis in transgressores legis, quoad executionem. Igitur qui in Christum non credunt, sunt quidem iudicati per legem, quatenus sunt rei damnationis æternæ, propter legis transgressionem: Sed nihilominus iudicabuntur à Christo, qui in illos sententiam feret quoad executionem. Hoc Chrysostomus hom. 27. in Ioannem, explicat à simili. Nam qui homicidium committit, eo ipso momento, quo illud committit, condemnatur à lege, tanquam reus mortis: Et postea condemnatur à Iudice, ut mortem re ipsa sustineat.

44. Puto tibi iam satisfactum esse de Purgatorio, quod tu Papisticum vocas. (Et vere Papisticum est, quia Calvinistæ eò non veniunt.) Sed nondum mihi satisfactum est de Purgatorio, quod ego ante aliquot annos Calvinisticum appellavi. Et fundatur in his principijs. Primo, quod peccatum Originale nihil aliud sit, quam *prauitas naturæ, cecitas mentis, & auersio voluntatis à Deo, cum reatu pœnæ æternæ*, vt tu ex Caluino definis in tuis thesibus de peccato. Secundo, quod hoc peccatum maneat in Calvinistis, quam diu in hac vita degunt, vt docet Caluinus lib. 2. instit. cap. 1. paragrapho 8. & alibi. Tercio, quod nihil immundum & inquinatum possit intrare in regnum cœlorum. (Apoc: 21. 27.) Ex his principijs sic conclusi: Nullus immundus & inquinatus potest intrare in regnum cœlorum, nisi prius purgetur & mundetur: Atqui Calvinistæ, quam diu hic viuunt, sunt immundi & inquinati propter peccatum Originale: Ergo non possunt intrare in

in regnum cœlorum, nisi prius mundentur & purgentur. Non purgantur autem in hac vita, quia semper hic manent obnoxij peccato Originali. Ergo, si salui esse velint, post hanc vitam purgari necesse est: Ergo datur aliquod Purgatorium pro Calvinistis, post hanc vitam. Hoc fusius disputavi in peculiari opusculo de Purgatorio Calvinistarum, ante complures annos. Sed nihil hætenus responsum. Tu, si quid habes, respōde. Sin minus, fatere quod res est.

5. De Authore Peccati..

45. **I**N altero Colloquio dixi, quod verissimum est, Deum ex sententia Caluini esse auctorem peccati. Et probavi ex ipso Caluino, qui lib. 1. inst. c. 18. §. 3. sic scribit: *Iam satis aperte ostendi, Deum vocari eorum omnium auctorem, quæ isti Censores volunt otioso tantum eius permissu contingere.* Vbi diserte loquitur de Peccatis, de quibus disputare cæperat, ac nominatim de cæcitate & Tyrānide Achabi; De incestu Absalonis;
De

De conuitio Semei; De Apostasia decem tribuum; De cædibus & rapinis Chaldeorum in Iudæa; De rabie Iudæorum in Christum; Deiniquo Pilati iudicio; & de alijs similibus. Horum omnium ait authorem esse Deum; riderque Catholicos Theologos, qui hæc sola Dei permissione dicunt euenire.

46. Quid tu ad hæc, Paree? Nihil tunc quidem. Nam (vt tu ipse fateris, pag. 146.) hanc quæstionem in aliud tempus seruasti disceptandam. Nec tamen toto decennio disceptasti. Nunc tandem hoc anno (cum scires me procul abesse in Austria; & alios, qui interfuerunt Colloquio, ex hac vita decessisse) fingis te respondisse, Caluinum eo loco, quem allegaui, non loqui de peccatis hominum, sed de occultis Dei iudicijs. Vt hic sit sensus: Deum esse authorem suorum iudiciorum, & non otiosum permissorem.

47. Mirares. Vt ex mera pertinacia defendas Caluinum; & te, & ipsum me. dacem facis. Te quidem, quia dicis te hanc responsionem dedisse ante decē-

D

nium,

nium, quod est falsum, vt ex tua concessione demonstraui. Caluinum vero, quia ipse loco citato disputat contra Scholasticos Theologos, asserentes ea, de quibus sermo est, fieri Deo permittente, non authore. At Scholastici nunquam dixerunt, occulta Dei iudicia fieri, Deo solum permittente, & nō authore. Ergo si tu Caluinum sic explikas, facis eum mendacem. Quod si adhuc tergiuersaris, accipe hunc syllogismum: Qui asserit Theologos Scholasticos docere, occulta Dei iudicia contingere sola Dei permissione, mendax est; quia hoc non docent Theologi Scholastici: At Caluinus, te interprete, asserit Scholasticos Theologos docere, occulta Dei iudicia contingere sola Dei permissione: Ergo Caluinus, te interprete, mendax est.

48. Sed audiamus ipsum Caluinū, qui optimus suæ sententiæ interpret est. Igitur lib. I. Instit. cap. 18. §. 1. sic ait: *Absalon incesto coitu Patris thorum polluens, detestabile scelus perpetrat. Deus tamen hoc opus suum esse pronunciat.* hoc nullo

nullo modo potest intelligi de occulto Dei iudicio; sed, sicut verba sonant, de incesto coitu Absalonis, de detestabili ipsius scelere, de opere, quo thorum Patris polluerat. Itaque ex mente Calvini, Deus hoc detestabile scelus Absalonis, pronuntiat esse suum opus: Vel, se esse authorem illius detestabilis sceleris. Nulla hic fit mentio occulti Dei iudicij. Considera hoc Domine Paree, & post alterum decennium responde.

6. De aliis quibusdam occurrentibus.

49. **D**E duobus punctis præcedentibus, nempe de Purgatorio & de authore peccati, inter nos duos actum est. De quibus sufficiant, quæ dixi. Sunt alia nonnulla, quorum à te mentio fit in conficta actorum narratione. Ex ijs pauca discutiam. Nam omnia, propter ineptias, non lubet.

Primo igitur pag. 4. de Iesuitis sic scribis: *Quos novi otio abundare: aduersarios, per quos inclarescant, studiosæ sectari: dicacitate superare: ad nullum mendaciam*

dacium erubescere: ex regula deniq, suæ instituto in animum induxisse suum, nulli cedere, nunquam tacere. Grauiasunt hæc, Parce. Sed tot calumniæ, quot sententiæ. Prima est, quod otio abundemus. Atperpetuo versamur in publica Theologia, Philosophiæ, & Humaniorum literarum professione; in docendo catechismo; in habendis ad populum cõcionibus; in audiendis pœnitentium confessionibus; in visitandis ægris & captiuis; in refutando Pareo & alijs hereticis. Adeo quidem, vt sæpe conquæramini, nos plus negotij vobis facessere, quam vllos alios. Hæc non sunt hominum otiosorum, sed strenue laborantium, nisi hoc voces otium, non ducere uxorem, non litigare cum famulis & ancillis; non sollicitos esse de alenda domi prole, aut filijs in matrimonium collocandis; non immergi in quotidianas curas rerum temporalium. Si hoc, tua opinione, otium est; fateor nos otiosos esse.

50. Secunda est, quod studiose sectemur aduersarios, per quos inclarescamus,

scamus, id est, quod Becanus, Serarius, Molhusinus, *unius Parei causa* (vt tu interpretaris) Svvalbachium conuolauerint, id maxime confectantes, vt contra tantum virum, tam celebrem Theologum, tam fortem ac robustum aduersarium, possint disputatione instituerre: atque adeo ex amplissimo, & toto terrarum orbe clarissimo, ipsius nomine aliquam laudem ac gloriam aucupari, quam aliunde sperare non poterant. Si hoc vis, Patee, nimium tibi blandiris. Certe Serarius & ego, non tui, sed Principis Ratziuilij causa, qui nos humaniter inuitauerat, Svvalbachium conuolauimus. Dete, ne cogitaueramus quidem, cum Svvalbachium iremus. Sed tu fingis chimeras, quæ non sunt. Nec tui Calvinistæ tanti te æstimant, quanti tu te ipsum. Nuper, cum ad Synodum nationalem in Holandiam vocati essent; exclusus es, & domi ad custodiendas sarcinas relictus.

§1. Tertia est, quod dicacitate superemus. Sed quid intelligis per dicacitatem? Si hoc solum vis, Iesuitas esse dicac-

ces, id est, multos libros scribere, frequentes ad populum conciones habere, quotidie iuventutem instituere; fateor id verum esse. Sed hoc laude, non vituperio dignum est. Si autem sic statuis, lesuitas esse dicaces, id est, multa conuitia dicaciter in alios conijcere; tibi ipsi, & tuis Calvinistis iniuriam facis. Vos n. in hac palæstra palmā fertis. Et quod verissime dixerō, inter vos ipsi certatis, quis dicacissimus haberi possit. Audi certamen inter te, Scaligerum, & Brederodium. Omnes Calvinistæ estis. Sed quis dicacissimus? Scaliger in Elencho vtriusque orationis chronologicæ, ait, te esse hominem *insanum, arrogantem, idiotam, stercora colligentem, prophanitatum buccinatorem, asininum, Sycophantam, Helleborismo egentem mendacem, communi sensu destitutū.* Tu vero, ne dicacitate inferior sis, non parcis illi. Nam in Epistola ad amicum anonymum scribis, Elenchos Scaligeri esse *insanos Verrinos maledicos futes, dicaces, impios, vanos, ridiculos, spurcos: oletis, stercoribus, sterquilinis, latrinis, clo-*

acis lutulentis oletatos: plenos diſteriorum, probrorum, Sarcasmodum, Scommatum, aculeorum, corybantiasmodum, Helleborismorum, & similium gryphorum. Brederodius neutri vult cedere. Cerre in Apologia sua pro Christiano Batauo, vix aliud eructat, quam lupanaria, lenones, meretrices, scortatores, spurios, stupra, adulteria, incestus, veneficia, cloacas, perfidias, proditiones, Sicarios, incendiarios, plagiarios, raptores, ardeliones, archiscurras, antichristos, lupos, apostatas, impostores, viperas, fædisfragos, Sycophantas, Sophistas; Et sexcenta similia phlegmata, quibus cor ipsius plenum esse necesse est, iuxta illud Christi, Matth. 12. 34. Ex abundantia cordis os loquitur. Quis vnquam Iesuitarum, his tot scommatibus ac calumnijs in alterum vsus est? Nemo. Vobis debetur hæc prærogatiua.

52: *Quarta est, quod ad nullum mendacium erubescamus. Hanc etiam laudem vobis reſeruate. Scaliger, vt iam dixi, ait te mendacem esse. Vel id verum, vel falsum est. Si verum, mendax es.*

Cur non erubescis? Si falsum, ipse mendax est. Cur non erubescit? Optime in vos quadrat illud Ieremiæ 6. 15. *Confusione non sunt confusi, & erubescere nescierunt.* Sed de hac vestra laude sat multa dixi in priuilegijs Calvinistarum, quæ communi populorum ac gētium consensu approbata sunt. Exemplar eorum apud te est. Si lubet, inspicere.

53. Quinta est, quod ex regulæ nostræ instituto, nulli velimus cedere, nūquam tacere. Nescio, an vnquam regulæ nostræ institutum inspexeris. Quidquid sit, dicam tibi candide, quod res est. Inijs, quæ ad fidem & religionem tuendam spectant, nulli cedimus Calviniano, nulli Lutherano, nulli alteri aduersario: semper parati viua voce, calamo, priuatim, publice, pro Ecclesia Christi pugnare: nullum certamen defugere, nullū laborem formidare. Hoc ægre vos habet. Velletis nos cedere, tacere, dissimulare, canes mutos esse. Nimirum, vt submotis Iesuitis, liceat vobis impune grassari in gregem Christi, Ecclesiam lacerare, religionem euertere,

tere, hæresin propagare. Frustra est. Quanto vos magis sæuitis, & Catholiceos persequimini: tanto nos ad resistendum efficimur alacriores. Nec est, Paree, quod aliud à nobis expectetis. Hoc regulæ nostræ institutum postulat. In eo persistimus, quam diu vivimus.

54. Pergo ad reliqua. Secundo pag. 7. sic scribis: *Interfuit plerisq; Collationibus D. Romanus, etiam hodie, nisi fallor, superstes: sicut & D. Rudgerus, Herbipolensis Collegij Iesuitici Rector, quorum ego testimonia, in hac causa de Fide historiae, libere appello.* Neuter, cum hæc scriberes, erat superstes. Neque te hoc latuit, Paree. Nihilominus de industria posuisti illā particulam, *Nisi fallor*, ut alios falleres. Nempe, ut putarent vere ac sincere te agere, cum tam libere ac confidenter audeas appellare ad testimonia eorū, qui adhuc vivunt, & reigestæ interfuerunt. Atque utinam viuerent. Satis scio, non libere, sed anxie; non confidenter, sed renitente conscientia, ad eorum testimonia appellares. Ego, cū

viuerent, eorum testimonia audiui. Quid ergo testati sunt? Hoc ipsū, quod Molhusinus scripsit ad nobilem virum D. Othonem à Berlips. Meministi, opinor. Nimirum, Pareum, propter ineptas & male fundatas responsiones, publico ludibrio fuisse expositum.

55. Tertio pergis ibidem: *D. Serarij in secunda collatione, cui soli adfuit, laudauit & laudo ingenuitatem. Is tertio maxime post, ut fama erat, fatis concessit: ipse sibi factus vates. Rogatus enim à me, quorum ageret annum, Respondit, ultimum. Ex vno ore calidum & frigidum efflas, D. Paree. Laudas hic Serarium Iesuitam. Et recte. At pag. 4. eundem Serarium, Becanum, & Molhusinum appellas vultures. Et paulo post, omnes omnino Iesuitas, & eorum Regulam ac institutū contumeliose insectaris. Quæ hæc inconstantia? Si Serarius tibi ingenuus est. Cur vulturi similem facis? Sed latet mysterium, quod non omnes intelligunt. Tu quidem obscure illud insinuas, pag. 26. At ego clarius explicabo. Est autem huiusmodi. Tunc temporis*

poris inter te & Scaligerum vige-
bat controuersia chronologica, quę in ma-
gnas angustias & miseras te adegerat.
Non enim, in ista quidem materia, par
eras Scaligero. Et tametsi ambo essetis
Caluinistę, ipse tamen publico scripto
pronunciabat te mendacem & igno-
rantem, vt supra recensui. Quid facce-
res? Ex vna parte regerebas conui-
tia, sat multa, vt vestri moris est: Ex al-
tera, quęrebas patronum, qui tibi assi-
steret. Oportune aderat Serarius, Sca-
ligeri hostis. Igitur ab eo subsidium po-
scebas. Nec tunc quidem, ipse abnue-
bat. Ab eo tempore cępisti laudare
hominis ingenuitatem. Bene quidem.
Sed constanter debebas hoc facere: &
non subito, quem ingenuum dixeras,
vulturi comparare. Quod addis, tertio
post mense, fatis cum concessisse, non
ita est. Vixit vsque ad finem Maij anni
subsequentis. Quod autem rogatus,
quotum annum ageret, responderit,
vltimum se agere, voluit significare, ho-
minem Christianum ita debere vive-
re, quasi non diu sit victurus.

56. Quarto progredieris ad Molhusinum, de quo sic scribis: *De Molhusinus, an & quando in viuis esse desierit, certo dicere non habeo: nisi quod vago rumore accepi, Treuiris obijisse. Singulari enim instituto hæc societas suorum funerationes occultat, ut immortales videri possint.* Iterum redis ad institutum nostræ societatis. Et nisi tam crasse hallucinaberis, merito posset quispiam suspicari, profugum Iesuitam te esse: Ac omnia Iesuitarum secreta habere cognita & perspecta. At aliter res habet. Ignoras institutum Societatis. Et quod hic ais, *Societatem singulari instituto occultare suorum funerationes, ut immortales videri possint;* ex mera calumniandi libidine facis. Contrarium apud nos fit. Quando quis moritur, mox fiunt publica Missarum sacrificia pro ipsius anima: adornatur publica sepultura: legitur publice officium defunctorum: scribitur ad singula Societatis Collegia toto orbe dispersa, ut fiant solita suffragia: affiguntur chartæ, quibus preces indiciuntur. Deniq; sic instituuntur omnia,

vt nullus occultandi aut ignorandi sit locus. Norunt hoc adollescentes, qui apud nos literis operam nauant: norunt Ciues, apud quos viuimus: norunt ex-
teri, ad quos subito hæc omnia deferū-
tur. Neq; qui mortales nos esse experi-
mur, mendacio immortalitatem affe-
ctamus. Alia immortalitas est, ad quam
suspiramus: non in falsa hominum per-
suasione, sed in cœlesti gloria ac fœli-
citate. Hanc tibi opto: illam, si quæris,
non inuideo.

57. Quinto pag. 35. ais te respon-
disse Molhusino, Sanctos in cœlis non
intelligere vel audire particulares no-
stras necessitates & gemitus. Et citasse
illud Isaïæ 63. 19. *Abraham nescit nos,*
& Israel non agnoscit nos. Et pag. sequen-
ti addis, Polonum quendam iuuenem
voluisse Molhusino hærenti, & à te cõ-
stricto succurrere, sed à te cohibitum
esse. Te tamen nescire, quid dixerit. I-
mo scis, quid dixerit: Sed non audes
promulgare. Ego promulgabo. Cum
proferres locum illum, *Abraham ne-*
scit nos, subiecit adolescens ille, non mi-
nus

nus facete, quam oportune : Bene dicis, D. Doctor : Abraham nescit vos Calvinistas. Excitatus est risus: Tu, ut rem dissimulares, subiecisti; *Tace quaso: Loquatur Magister pro seipso.* Hæc vera historia est, & multorum testium assertione confirmata.



AD

AD LECTOREM.
DE POSTERIORI
parte Epistolæ.




T etiam hanc partem intelligas, sic accipe. Ante annos duodecim scripsi tractatum de fide hæreticis seruanda. Bis illum oppugnavit Batauns Calvinista, amicus Parei: bis repulsus est. Et iam silet toto decennio. Pareus, quam diu Moguntia fui, nihil unquam tentavit. Nunc demum ante annum, quod sciret me Vienna in Austria commorari, in absentem verbo & calamo debacchatus est: confidens, ex tam longa locorum distantia, nullam se plagam à me accepturum. Et forte securus fuisset, si Vienna mansissem. Ibi enim de Pareo, vel Parei libellis, vix aliquid in publico auditur. Verum aliter res accidit. Superiori mense ex Austria Moguntiam redij. Ibi libellus, quem in me scripsit, mihi oblatus est. Inspexi, legi, refutavi: ut iam videbis.

P O.

POSTERIOR PARS EPISTOLÆ

D E

FIDE HÆRETICIS *servanda.*

1.  On ægrè feras, D. Parce, si diutius te interpellem, quam velis. Occurrit aliud, quod suggeram. Cū istis diebus discuterem Acta Colloquiorum Svvalbacensium à te conscripta, accessit Canonicus Moguntinus, amicus meus, & ecce alterum tuum Libellum exhibuit, cum hac inscriptione: *Oratio inauguralis de fide hæreticis servanda.* Ac simul insinuavit, in eo diserte me perstringi, & perfidiæ Magistrum appellari. Facile id credebam; præsertim quod ex priori tuo Libello probe iam nossem; familiare tibi esse, convitijs ac maledictis adversarium impetere. De quibus nihil dicam ulterius. Maneant

neant tibi tua conuitia. Dere ipsa, quæ in controuersiam venit, tecum agam.

2. Igitur ex meo Tractatu, de fide hæreticis seruanda, transcribis & exagitas hæc principia à me posita.

Primum: In promissis, pactis, & conuentis seruanda est fides hæreticis: modo promissa, pacta, & conuenta sint alias licita & honesta.

Secundum: Libertas fidei ac religionis illicita est; & Doctrinæ Christianæ contraria; & Reipublicæ noxia ac pernitiosa.

Tertium: Princeps Catholicus, non potest præcipere, approbare, aut introducere libertatem religionis; sed omnibus modis, quantum fieri potest, impedire. Si tamen impedire non possit sine maiori incommodo boni publici; potest eam tolerare, tâquam minus malum, ad euitandum maius malum, quod alioqui sequeretur. Et, si paciscatur cum hæreticis de toleranda libertate religionis, quam sine maiori detrimento impedire non potest, fides pacti seruanda est.

Quartum : Promissum vel pactum per vim aut metum iniuste extortum, rescindi potest; si is, qui iniuste vim aut metum passus est, id postulet.

3. Agnosco hæc principia à me posita. Quid tu vero, D. Parce? Ais primum principium destrui per annexam hanc clausulam: *Modo promissa, pacta & conuenta sint alias licita & honesta.* Vnde apparet, clausulam illam, ex tua quidem sententia, tollendam esse : Et absolute asserendum, in quibuscunque pactis ac promissis, etiam illicitis & inhonestis, fidem seruandam esse. Quod nescio, an aperte ausis profiteri. Tertium principium nihil aliud esse affirmas, quam *vafrum perfidia tegumētum ac ludibrium.* De reliquis, vera an falsa sint, disertè non dicis. Omnia tamen vellicas, arrodas, & miras consequentias inde deducis. Vno verbo: Iracunde & fastidiosè despuis, quidquid à me positum est. Sed obsecro, sepone aliquantulum istam animi tui turbationem; & pacatè audi, quæ pro me allaturus sum. Forte aliter senties, quam hætenus.

4. Ac initio quidem postulo, quod negare non potes, vt remotis cōtrouersijs domesticis, quæ inter Pontificios & Caluinistas consistunt, hoc vnum præcisè nunc agamus: An hæreticis, qui verè hæretici sunt, seruanda sit fides, nec ne? Neque misceamus odiosas illas & particulares quæstiones: An Pontificij, an Lutherani, an Caluinistæ verè hæretici sint? Maneamus in thesi generali, De hæreticis, qui verè sunt hæretici. Aut si lubet speciatiim descendere ad hos vel illos, in particulari; descendamus ad eos, qui & vestra, & nostra opinione, verè hæretici sunt, vt Donatistæ, Manichæi, Ariani. Sic enim futurum est, vt de fide hæreticis seruanda, maiori fide ac cādore inter nos agatur. Hoc iacto fundamento, accuratè examine-
mus, an principia à me posita, vera sint, nec ne. Neq; vel tu cogites, Caluinistas à Pontificijs; vel ego cogitem, Pontificios à Caluinistis, pro hæreticis haberi. Hæc enim cogitatio solet turbare animum, vt sincerè iudicare vel non velit, vel ægrè possit. Est igitur

PRIMUM BECANI PRINCIPIVM.

5. *In promissis, pactis, & conuentis, seruanda est fides Manichæis & Donatistis, etiamsi verè hæretici sint: modo promissa, pacta, & conuenta sint alias licita & honesta.*

Huius principij duæ sunt partes. Vna, in promissis, pactis, & conuentis, fidem hæreticis seruandam esse: Ad-do, nec minus hæreticis, quam Catholicis. Ratio est, quia obligatio seruandæ fidei in promissis & pactis oritur ex virtute veritatis, fidelitatis, & iustitiæ, vt fuisse in supradicto meo Tractatu demonstratum est. Neque tu id negas, sed approbas. Iam vero virtutes illæ æquæ nos obligant, siue paciscamur cum hæreticis, siue cum Catholicis. Sicut enim veritas me obligat, vt non mentiar Catholico; fidelitas, vt non sim perfidus Catholico; iustitia, vt non faciam iniuriam Catholico: ita etiam me obligant, vt non mentiar, non sim perfidus, non sim iniurius hæretico.

6. Hinc sequitur, si Catholicus paciscatur cum hæretico de cōmutatio-

ne aut venditione fundi, de feudo, emphyteusi, piscatione, venatione, de saluo conductu, de dote matrimoniali, de subsidio in iustum bellum conferendo, & de alijs similibus, quæ iure gentium concessa sunt; pacti fidem seruandam esse. Nunquid idem sentis, D. Paree? Si sic, mecum sentis. Sin aliter, iam tu ipsius iudicio perfidiæ Magister es. Hûc enim titulum tribuis illis, qui vel negant, vel tua opinione videntur negare, fidem hæreticis seruandam esse.

7. Altera pars continet hanc clausulam: *Modo promissa, pacta & conuenta sint, alias licita & honesta.* Quid censes, Paree? Rectene posita est hæc clausula, an tollenda? Si ais recte positam esse, mecum sentis. Neque verum est, primum principium per appositionem illius clausulæ destrui ac euerti. Si ais tollendam esse (sicut præ te fers) quid respondebis vtriusque Iuris Doctoribus, qui mecum docēt, promissiones etiam iuramento confirmatas, si sint de re illicita vel turpi, seruandas non esse? Audi ipsorum verba. In iure ciuili sic ha-

bes: *Legibus expressum est, illicita rei iusiurandum seruari non oportere.* (L. Imperialis, §. quod eis permittitur, Cod. de Nuptijs.) In iure autem canonico, præsertim apud Gratianū, causa 22. quæst. 4. hæc passim obuia sunt. Primo: In malis promissis rescinde fidem. 2. Non est obseruandum sacramentum, quo malum incautè promittitur. 3. Magnæ sapientiæ est, reuocare hominem, quod male locutus est. 4. Si aliquid forte incautius nos iurasse contigerit, quod obseruatum in peiorem vergat exitum, illud salubriori consilio mutandum nouerimus. 5. Iuramenta illicita laudabiliter soluuntur; damnabiliter obseruantur. 6. Iuramentum non est vinculum iniquitatis.

8. Quod etiam varijs exemplis in utroq; iure confirmatur. Primo, exemplo Herodis, qui peccauit seruando illicitam promissionem ac iuramentum. (can. Est etiam, 22. quæst. 4.) Secundo, exemplo Davidis, qui laudatur, quod non seruauerit iuramentum, quo promiserat se interfecturum Nabal. (can. si
ali-

aliquid, ibidem.) Tertio, exemplo mulieris adulteræ, quæ iurauerat se adultero adhæsurâ. Et quia hoc non fecit, non censetur violasse iuramentû, sed prudenter omisisse. (can. Mulier, ibidē.) Quarto, exemplo cuiusdam Hubaldi, qui iurauerat, se concubinam suam velle accipere in vxorē; & propriam matrē cū fratrib. è domo expellere, nec vllâ eis alimoniam præstare. Cui suatum fuit, vt posteriorē partem iuramenti, vtpote illicitâ non seruaret (can. inter cætera, ibidem.) Quinto, exemplo mulierum scnicarû, quæ iuramento promiserant, se pmanfuras in suo peccato; & libidinis infamia. Quibus responsû est ab Imperatore, tali iuramento ac pmissione eas non obligari. (L. citata, C. de Nuptijs.)

9. Si hæc vera sunt (de quo nec Theologos, nec Iureconsultos vestros Heidelbergenses dubitare, certo mihi persuasum est) necessario sequitur, clausulam illam, quam addidi: *Modo promissa, pacta & conuenta sint alias licita & honesta*; omnino addendam esse. Et, si illorum iudicio, addenda est, non rectè à te

dictum, primum principium per illam clausulam destrui ac everti. Hic velim, sincere tuam mentem aperias. Quod si contemptu vtriusque iuris & Interpretum autoritate, putes te plus sapere, quam illi sapiant; & pertinaciter asseras, supradictam clausulam submouendam esse; responde ad hunc casum, quæ propono. Pareus cum Catharina pactus est de adulterio, & de veneno marito ipsius porrigendo. Quæstio est, an teneatur seruare fidem; & vi illius pacti, adulterium committere, & venenū porrigere? Vide, quid respondeas. Si putas te non teneri, hoc ideo est, quia pactum est turpe & illicitum. Et sic, tua opinione, clausula illa, quam addidi: *Modo pacta sint alias licita & honesta*; addenda est. Si autem putas te teneri, putas etiam teneri te ad peccatum. At nulla est obligatio, quæ hominem constringat ad peccatum. Nec ex vlla virtute oriri potest talis obligatio. Alioqui virtus non esset virtus, sed vitium. Quo nihil absurdius.

SECUNDVM BECANI PRINCIPIVM. 366

10. *Libertas fidei ac religionis planè illicita est, & Christianæ doctrinæ contraria, & Reipublicæ noxia ac pernitiōsa.*

HOc principium continet tres partes. Prima est, libertatem fidei ac religionis plane illicitam esse. Quam sic probo. Libertas religionis, de qua hic loquimur, in eo consistit, vt quilibet possit habere liberum exercitium hæreticæ religionis, id est, liberè profiteri hæresin Donatistarum, & eorum Sacramenta vsurpare. Hoc sine dubio illicitum est. Nā, vt rectè docent Theologi, grauius peccatum est hæresis, quā adulterium, homicidium, furtum. Si ergo liberum exercitium adulterij, homicidij, & furti planè illicitum est; multo magis liberum exercitium hæresis. Nemo sanæ mentis id negat.

ii. Secunda est, liberum exercitium hæreticæ religionis cōtrarium esse doctrinæ Christianæ. Nihil certius. Nam doctrina Christiana est vera; hæretica

religio, falsa. At verum falso contrariū est. Quospectat illud 2. Corinth. 6. 15. *Qua societas luci ad tenebras?* Rursum, doctrina Christiana est vna, Eph. 4. 5. *Vnus Dominus, vna fides, vnum baptisma.* Doctrina hæretica est multiplex ac varia, Hebr. 13. 9. *Doctrinis varijs & peregrinis nolite abduci.* At vnum & multiplex, in hoc genere, non aliter opponuntur, quam vnus & plures Dij. Vel, quam vnus verus Deus, & multi falsi Dij.

12. Tertia est, liberum exercitium hæreticæ religionis, Reipublicæ noxi-um ac perniciosum esse. Et quidem dupliciter. Primo, quoad salutem animarum. Quod insinuat Apostolus 2. Tim. 2. 17. vbi de hæreticis sic scribit: *Sermo eorum, vt cancer, serpit.* Quasi dicat: Sicut cancer est morbus contagiosus, qui vbi vnā corporis partē occupauerit, sensim peruadit & corrumpit totū corpus: sic hæresis est contagiosa doctrina, quæ vbi vnum aut alterum hominem in aliqua communitate possederit, paulatim inuadit & peruertit totam communi-

munitatem, nisi mature occurratur. Secundo, quoad externam pacem & tranquillitatem. Hæc enim sine vnitæ fidei conseruari non potest. Vbi ergo diuersitas fidei est, ibi dissensiones & factiones esse, necesse est. Hoc testatur Christus, cum ait: *Omne regnum in se diuisum desolabitur.* Hoc testantur omnium pene sæculorum exempla. Ariani turbant totum Orientem: Macedoniani Græciam: Donatistæ Africam. Taceo cætera. Et quid hoc tempore turbat Hollandiam, nisi dissensiones vestrorum hominum, id est, Calvinistarum? Gommaristæ vi & ferro persequuntur Arminianos. Nimirum Calvinistæ Calvinistas. Malim de hac re silere, quam loqui, quia odij ac inuidiæ plena est. Sed tamē, vt videas Paree, quam verum sit, quod asserui de exercitio hæreticæ religionis; volui potius insinuare, quam penitus dissimulare.

TER-

TERTIVM BECANI PRINCIPIVM.

13. *Princeps Catholicus non potest præcipere, approbare, aut introducere libertatem religionis; sed omnibus modis, quantum fieri potest, impedire. Si tamen sine maiori detrimento boni publici impedire nequeat; potest eam tolerare, tanquam minus malum, ad evitandum maius malum, quod alioqui sequeretur. Et, si paciscatur cum hæreticis de toleranda libertate religionis,*

fides pacti servanda

est.

HVius principij sunt etiam tres partes. Prima, Principem Catholicū non debere præcipere, approbare, aut introducere, sed omnibus modis, quantum fieri potest, impedire liberum exercitium hæreticæ religionis. Sequitur ex dictis. 1. Quia huiusmodi exercitium est illicitum. 2. Est doctrinæ Christianæ contrarium. 3. Est Reipublicæ pernitiosum. 4. Est magis detestabile, quam exercitium adulterij, homicidij, furti. Quis autem neget, Principem in sua Republica debere omnibus modis, quantum fieri potest, impedire liberū
exer-

exercitium adulterij, homicidij, furti? Quanto magis liberum exercitium hærelis? Hinc illa sanctio Imperatoria, L. Nullus, Cod. De summa Trinitate & fide Catholica: *Nullus hæreticis minorum pateat locus.* Item, *Arceantur cunctorum hæreticorum ab illicitis congregationibus turba.* Item, *Si quid eruptio factiosa tentauerit, ab ipsis etiam urbium manibus propelli iubemus.* Et L. Cuncti, Cod. de hæreticis & Manichæis: *Cuncti hæretici procul dubio nouerint, omnia sibi loca adimenda esse.* Vide plures leges ibidem.

14. Altera est, Si Princeps Catholicus, sine maiori incommodo boni publici, nō possit impedire exercitiū hæreticæ religionis; posse tunc illud tolerare seu permittere, ad maius illud incommodum euitandum. Ita sentiunt grauissimi Authores, qui passim docēt. Ex duobus malis, si ambo simul euitari nequeant, minus malum eligendum esse. Et ratio est, quia in tali casu non eligitur minus malum, quatenus malum est, sed quatenus conducit ad euitandum

dum maius malum, quod aliter euitari non potest. Ac proinde eligitur subtractione boni vtilis seu conducibilis. Deinde, ipsa natura hoc dictat. Quis n. ex instinctu nature nō agnoscit, stultū esse, ex duob. malis occurrentib. eligere id, q. mai⁹ est? Tu ipse dic Paree; si latro alterutrū ē duob. vel pecuniā, vel vitam tibi vellet auferre; malle sne vitā, quam pecuniā amittere? Non opinor. Accōmodemus ad rē, de qua agitur. Donatistæ petūt à Catholico Principe, vt pmit-
tat ipsis exercitiū suæ hæresis in vno tē-
plo: Et simul minātur, nisi annuat, se om-
nia Catholicorū tēpla occupaturos,
& Catholicorū exercitium abolituros.
Quid faciet Princeps? Si potest vtrunq;
euitare, tenetur. Si alterutrum eligen-
dum est, eliget quod minus est. Minus
malum est, permittere hæreticis vnum
templū pro exercitio; quā permittere,
vt omnia deuastentur, & fides Catholi-
ca penitus extirpetur. Nemo dubitat.
Si tu aliter sentis, parum sanus es.

15. Tertia est, Si Princeps Catholi-
cus paciscatur cum hæreticis de tole-
randa

347
randa libertate religionis, quā sine maiori incōmodo boni publici impedire non pōt, fidem pacti seruandā esse. Ratio patet ex dictis, quia fides seruari debet in omni pacto licito & honesto: atqui licitū & honestū est, tolerare libertatē religionis ad maius malū euitandū; & de ea toleranda licitè & honestè pacisci pōt Princeps Catholicus, in tali necessitate: Ergo, si paciscitur, fides seruanda est. Repetā exemplū, q, posui. Princeps paciscitur cū Donatistis de tolerando exercitio religionis ipsorum in vno tēplo, ad euitandū huiusmodi exercitium in reliquis tēplis, i. paciscitur de tolerando minori malo ad euitādum maius malum; teneturne seruare fidē, nec ne? Si ais seruandum esse, cur me perstringis, qui idem doceo? Si negas seruandam esse, cur seruanda non est? An quia pactum, vt tu putas fortasse, illicitum est? Concedis ergo fidem seruandam esse, cum hac clausula, modo pactum sit alias licitum. At hoc supra negasti, vel visus es negare. Dic rotunde & sine ambagibus, quid sentias.

Quar.

QUARTVM BECANI PRINCIPIVM.

16. *Promissum vel pactum, per vim aut metum iniuste extortum, rescindi potest, si is velit, qui iniuste vim aut metum passus est.*

PROPTER hoc principium, quod etiã posui in supradicto meo Tractatu, vocas me perfidiæ Magistrum. Sed audi, mi homo. Non sum perfidiæ Magister, sed doceo, quod docent vtriusque Iuris Doctores ac Interpretes. Illorum doctrina hæc est. Si quis vi vel graui metu iniuste coactus est contrahere vel pacisci; huiusmodi contractus vel pactum non est quidem planè irritum; potest tamen à Iudice rescindi & in irritum reuocari, tris, qui iniuriam passus est, id postulet à Iudice. Hanc posteriorem partem, quam tu carpis, reperies in vtroque iure. Et quidem in iure canonico, cap. 2. De his, quæ vi, sic legimus: *Vnde, quia quæ metu & vi fiunt, debent iure in irritum reuocari; mandamus, quatenus prædicto R. cum integritate restituas omnia.* Et ibidem cap. 4. *Quæ vi metu sue causa fiunt, carere debent robore*

fir-

